

Analiza i plan izgradnje poslovnih zgrada MUP-a KS

Partije: Vlada Kantona Sarajevo (NS, SDP, NiP) | Oblasti: Pravna država

Izvršiti analizu i plan izgradnje poslovnih zgrada MUP-a Kantona Sarajevo u sjedištu PU Centar, PU Novo Sarajevo, PU Ilidža i eventualno drugih zgrada potrebnih za obavljanje policijskih poslova Uprave policije u MUP Kantona Sarajevo.

Izvor: Program skupštinske većine u Kantonu Sarajevo 2023-2026

Za izgradnju novih objekata za potrebe MUP KS Prijedlogom budžeta Kantona Sarajevo za 2023. godinu planirana su sredstva u iznosu 2.000.100 KM, dok je za dogradnju i **adaptaciju IV PU planiran iznos od 1.650.100 KM.**

ODGOVOR: REALIZOVANO

NOVA ZGRADA MUP-A KS

U decembru 2023. godine premijer Kantona Sarajevo Nihad Uk i direktor KJKP „Vodovod i kanalizacija“ Rusmir Salić potpisali su Ugovor o prenosu prava vlasništva uz protučinidbu u vezi sa prostorom u ulici Kolodvorska, a na kojem će se biti izgrađena **nova zgrada Ministarstva unutrašnjih poslova**. Ovaj korak približio je MUP KS ostvarenju dugogodišnjeg cilja, a to je izgradnja nove zgrade i administrativnog sjedišta. Samom potpisivanju ugovora prethodio je niz ključnih koraka i aktivnosti koji su morali biti poduzeti kako bi se pokrenuo projekat izgradnje nove zgrade MUP-a KS, prvi put od 1997.godine. „To nije samo pitanje administrativnog sjedišta policije, to je pitanje sigurnosti svih nas, naše djece, naše budućnosti. Strpljivo, korak po korak, u 2023.godini savladavali smo prepreke kako bismo bili korak bliže našem cilju - izgradnji nove zgrade MUP-a KS. Održali smo niz sastanaka sa upravom KJKP "Vodovod i kanalizacija" s ciljem postizanja dogovora oko prenosa vlasništva, s Općinskim vijećem i načelnikom Općine Novo Sarajevo na čijoj će se teritoriji graditi zgrada, Zavodom za izgradnju KS koji je naš strateški partner u ovom projektu i bez kojeg ne bismo mogli, kao i sa svim ostalim interesnim grupama u ovom projektu. Slobodno mogu reći da smo u 2023.godini riješili pitanja bez kojih se zgrada ne bi mogla graditi i koja su godinama bila kamen spoticanja,“ pojasnio je ministar Katica.

Prošle godine formirane su i radne grupe koje su se parcijalno posvetile rješavanju pojedinačnih pitanja vezanih za zgradu, te kontinuirano izvještavale o rezultatima svog rada i poteškoćama na koje su nailazili. Jedno od pitanja sa kojim su se suočili, a koje je moralo biti riješeno je i nemogućnost izgradnje zgrade zbog Odluke o privremenim mjerama zaštite ventilacionih koridora KS. Iako su prepreke iz dana u dan bivale sve veće, mogućnost odustajanja nije bila opcija i sistemski su se rješavale.

Konačno, 07.novembra prošle godine, Skupština Kantona Sarajevo dala je saglasnost Vladi za zaključivanje ugovora o prenosu prava vlasništva između Kantona Sarajevo i KJKP Vodovod i kanalizacije, da bi krajem decembra bio potpisan i ugovor kojim se navedeno reguliše. Nakon toga, MUP KS nastavio je koordinaciju sa nadležnim institucijama kako bi se postupci maksimalno ubrzali. Maksimalnu podršku projektu pružio je Zavod za izgradnju Kantona Sarajevo na čelu sa direktoricom Belmom Barlov, strateški partner MUP-a KS u ovom projektu, bez čijih jasnih smjernica i stručnih imputa projekat ne bi tako brzo napredovao.

Intenzivno se saradivalo i sa Zavodom za planiranje razvoja KS, Direkcijom za puteve KS i Arhitektonskim fakultetom u Sarajevu u cilju regulisanja pratećih aktivnosti izgradnje centralne zgrade MUP-a KS. Svi dosadašnji radni sastanci protekli su u produktivnoj

atmosferi i iskazano je opredjeljenje da se sve institucije i nadležne uprave maksimalno uključe u regulisanje svih potrebnih pravnih i infrastrukturnih pitanja kako bi projekat što prije zaživio.

U 2023. godini završen je i idejni projekat rušenja postojeće građevine na ovoj lokaciji, a rušenju će se pristupiti tokom 2024.godine. Plan MUP-a KS i ministra Admira Katice je da se u 2024. godini završi idejni i izvedbeni projekat nove zgrade, osiguraju administrativne dozvole, te izvrši uklanjanje postojeće građevine sa lokacije.

PU NOVO SARAJEVO

Centralna zgrada Ministarstva unutrašnjih poslova Kantona Sarajevo predstavlja jedan od najvećih, ali zasigurno i najkompleksnijih projekata MUP-a KS, a u njoj će se nalaziti sjedište ministarstva, saobraćajne policije i **Policijske uprave Novo Sarajevo.**

PU NOVI GRAD

U toku je dogradnja i adaptacija Policijske uprave Novi Grad: Dograđuju se nove prostorije za izdavanje ličnih dokumenata, kriminalističku policiju, arhivu

MUP Kantona Sarajevo je u augustu 2023.godini počeo jedan od većih infrastrukturnih projekata, a to je nadogradnja i adaptacija zgrade Policijske uprave Novi Grad, u naselju Švrakino Selo, općina Novi Grad. Prva faza projekta je završena, te je u toku druga faza. U prvo fazi je urađena temeljna konstrukcija, podna ploča, armirano-betonski zidovi na prvoj etaži i priprema za drugu ploču. U drugoj fazi ????

Zgrada će dobiti oko 1.000 m² novog prostora, a u ovaj projekat uložiti će se 1,6 miliona KM. Dogradnjom novih prostorija omogućiti će se novi kvalitet usluga, bolji prostor za uposlenike i poboljšati efikasnost rada policijskih službenika. U novim, dograđenim prostorijama šalter sale, građanima će se ubuduće pružati usluge izdavanja ličnih dokumenata koje sada ostvaruju u prostorijama pošte na Alipašinom Polju. To će se promijeniti i dokumenti će se izdavati u PU Novi Grad, a dogradnjom će se osigurati i novi prostor za rad kriminalističke policije, arhivu i kancelarije.

PU ILIDŽA

U septembru 2023. godine ministar MUP-a KS Admir Katica i načelnik Općine Ilidža Nermin Muzur obišli su potencijalne lokacije za izgradnju nove zgrade PU Ilidža. Općina Ilidža maksimalno je podržala ovaj projekat, te je MUP KS odmah formirao Radnu grupu za izgradnju nove zgrade PU Ilidža koja je intenzivno radila na projektu u prethodnom periodu. 23.02.2024. održan je još jedan radni sastanak između predstavnika Ministarstva unutrašnjih poslova Kantona Sarajevo, Zavoda za izgradnju Kantona Sarajevo koji je strateški partner MUP-a KS na svim infrastrukturnim projektima i Općine Ilidža povodom analize poduzetih koraka na realizaciji projekta izgradnje nove zgrade Policijske uprave Ilidža.

Osnovni cilj ovog projekta je da se stvore optimalni uslovi za centralizaciju i objedinjavanje službi MUP-a Kantona Sarajevo - Uprave policije, te je planirano da ubuduće sve službe MUP-a Kantona Sarajevo - Uprave policije nadležne za područje općine Ilidža budu smještene u jednom objektu koji će svojom veličinom, sadržajem, dispozicijom, planiranim prostorijama i parking mjestima, omogućiti bolje i efikasnije obavljanje poslova i radnih zadataka.

MUP Kantona Sarajevo je u saradnji sa Općinom Ilidža odabrao adekvatnu lokaciju za novu zgradu PU Ilidža, koja svojim karakteristikama zadovoljava postavljene uslove, a nalazi se na lokaciji Butmirska cesta. Radna grupa za izgradnju ovog objekta uradila je projektno rješenje nove zgrade.

Na sastanku definisani su naredni koraci s ciljem ubrzane dinamike ispunjavanja svih preduslova za realizaciju ovog projekta. U narednim danima izvršit će se geodetsko snimanje lokacije. Nakon rješavanja imovinsko-pravnih odnosa, na osnovu Idejnog projekta, MUP Kantona Sarajevo pribavit će Urbanističku saglasnost od Općine Ilidža za izgradnju nove zgrade PU Ilidža sa vanjskim uređenjem, a nakon čega će se pokrenuti procedure izrade Izvedbenog projekta. MUP Kantona Sarajevo također će osigurati neophodna finansijska sredstva za eksproprijaciju zemljišta od njegovih vlasnika.

PU STARI GRAD

Nakon analize stanja objekta PU Stari Grad, prvobitno je planirano da se postojeći objekat nadogradi za jedan sprat i potkrovlje za potrebe Uprave policije i za to je urađen idejni projekat. Međutim, na prijedlog Uprave za građanska stanja da u istoj zgradi ubuduće bude smješten i Sektor za građanska stanja Stari Grad (izdavanje ličnih karata, pasoša, vozačkih dozvola, CIPS prijava itd), a koji trenutno djeluje u zgradi Općine Stari Grad Sarajevo u iznajmljenim prostorijama, urađeno je novo idejno rješenje koje je uključivalo i izgradnju šalter sale na objektu PU Stari Grad, u ulici Logavina. Kompletan projekat je dostavljen Općini Stari Grad Sarajevo koji su obavijestili MUP KS da je za izdavanje odobrenja za građenje nadležno Federalno ministarstvo prostornog uređenja koje treba tražiti saglasnost Komisije za nacionalne spomenike BiH, te je Općina prosljedila projekat resornom ministarstvu. Trenutno se čeka odgovor Federalnog ministarstva prostornog uređenja.

PU TRNOVO

Radna grupa za igradnju objekta PU Trnovo sačinila je tekst Projektnog zadatka za izradu Idejnog rješenja i Idejnog projekta objekta MUP-a KS i Uprave policije MUP-a KS na području Općine Trnovo i isti usaglasila sa ministrom i policijskim komesarom. Tekst Projektnog zadatka je bio dostavljen na dalje postupanje i prikupljanje ponuda za izradu Idejnog rješenja i Idejnog projekta, ali je zbog angazovanja novog člana Radne grupe isti povučen radi dopune i ažuriran sa prijedlozima za dopunu dostavljenih od novog člana, t će uskoro biti upućen u dalju proceduru.

Predstavnici Općine Trnovo i MUP-a KS su usaglasili lokaciju na kojoj će se graditi nova zgrada za potrebe organizacionih jedinica ministarstva i Uprave policije. Veličina parcele, prema informacijama nadležne službe općine Trnovo, će biti utvrđena kada dostavimo zahtjev za urbanističku dozvolu, a isti možemo dostaviti kada se završi izrada Idejnog rješenja i Idejnog projekta.

POLICIJSKA STANICA DOBRINJA

MUP Kantona Saraajevo i Općina Novi Grad Sarajevo trenutno su u fazi finalizacije sporazuma o zajedničkoj izgradnji objekta na Dobrinji u kojem će biti smještena PS Dobrinja, ambulanta, mjesna zajednica i Centar za zdravo starenje. Bit će to zajednička investicija MUP-a KS i Općine Novi Grad u vrijednosti od 3,5 miliona KM. Općina Novi Grad izradit će idejni projekat, glavni projekat, provesti postupak javne nabavke za izbor izvođača radova, i izgradnju objekta.

HANGAR ZA AUTOSERVIS, VULKANIZERSKU RADIONICU I SKLADIŠTE

MUP Kantona Sarajevo planira izgradnju novih hangara za: autoservis, radionicu vulkanizerskih radova, skladišta za rezervne dijelove i druge vrste materijala i kancelarijske prostorije, a nalazit će se na Stupu, u općini Ilidža.

U ovim hangarima, kao i do sada, vršit će se servisiranje svih vozila u vlasništvu MUP-a Kantona Sarajevo, kao i forenzika vozila koja su učestvovala ili potiču iz krivičnih djela. Novoprojektovani objekat bit će moderan i funkcionalan, te ispunjavati sve potrebe MUP-a Kantona Sarajevo, imat će dvije velike hale sa prizemljem i galerijskim prostorom, 24-erosatno fizičko osiguranje, kao i video nadzor.

Postojeći hangari u ulici Zmaja od Bosne, u neposrednoj blizini Importane centra i Raiffaisen banke, koji su privremenog karaktera, postavljeni su još prije agresije na Bosnu i Hercegovinu i ne zadovoljavaju potrebne standarde, dotrajali su i nefunkcionalni, te će biti uklonjeni.

Gradnjom nove infrastrukture MUP Kantona Sarajevo jača vlastite kapacitete, istovremeno obezbjeđujući resurse koji ostaju u trajnom vlasništvu ovog sigurnosnog organa sa jasno riješenim pitanjima vlasništva nad objektima i zemljištem.

Završen je idejni projekat za izgradnju hangara, a uslijedit će izrada izvedbenog projekta nakon čega će se moći definisati vrijednost projekta, kao i rokovi za izgradnju.

Analiza implementacije Zakona o unutrašnjim poslovima i Zakona o policijskim službenicima KS

Partije: Vlada Kantona Sarajevo (NS, SDP, NiP) | Oblasti: Pravna država

Vršiti analizu implementacije Zakona o unutrašnjim poslovima i Zakona o policijskim službenicima Kantona Sarajevo, procjena utjecaja propisa u dijelu funkcije unutrašnje kontrole, integriteta policijskih službenika (body kamere, ostvarenje jačanja integriteta policijskih službenika kroz jačanje antikoruptivnih mjera i ostalo).

Izvor: Program skupštinske većine u Kantonu Sarajevo 2023-2026

Kako su za Istinomjer 23. juna 2023. godine rekli iz MUP-a KS ograničeni dvofazni postupak nabavke Body Worn kamera je u procesu realizacije. Pored toga, okončana je Prva faza predkvalifikacije, te će oni ponuđači koji su ispunili zakonom propisane uslove kvalifikacije pristupiti aktivnosti iz Druge faze – podnošenju ponuda. Po okončanju nabavke ovih materijalno-tehničkih sredstava, ona će biti u testnom periodu stavljena u upotrebu u Jedinici za saobraćaj, s obzirom na činjenicu da je u proteklom periodu Uprava policije MUP-a Kantona Sarajevo provela određene operativno-taktičke radnje koje su rezultirale sudskim postupcima protiv policijskih službenika Jedinice za saobraćaj, zbog sumnje u koruptivna ponašanja.

Na održanoj press konferenciji povodom 100 dana mandata Vlade KS 4.7. 2023. godine ministar Admir Katica kazao je da je u budžetu za 2023. godinu za nabavku uniformi za policijske službenike izdvojeno 3.800.000 KM. Ovom prilikom Katica je apelovao na više nivoje vlasti, Vladu FBiH da što prije usvoji **Uredbu o jedinstvenoj uniformi policijskih službenika u FBiH**, na osnovu koje bi se formalno mogla nabaviti bolja i kvalitetnija uniforma za policijske službenike.

Kada je riječ o **Body Worn kamerama**, ministar Katica je na istoj press konferenciji naveo da se čeka usvajanje pomenute Uredbe te je istakao da je u budžetu za 2023. godinu izdvojeno 490.000 KM za nabavku Body Worn kamera, te da se nada da će do kraja 2023. godine iste biti nabavljene.

ODGOVOR: REALIZOVANO

Izvršena je analiza implementacije Zakona o unutrašnjim poslovima i Zakona o policijskim službenicima Kantona Sarajevo, procjena utjecaja propisa, integriteta policijskih službenika (body kamere, ostvarenje jačanja integriteta policijskih službenika kroz jačanje antikoruptivnih mjera i ostalo).

U toku 2023. godine raspisan je javni konkurs i izvršen prijem 195 policijskih službenika na osnovu konkursne procedure koja je u potpunosti u skladu sa propisima navedenih zakona. Zakoni propisuju da pitanja za ispite općeg znanja moraju biti dostupna kandidatima putem zvanične web stranice MUP-a KS, što je i učinjeno. Također, propisano je da procedure prijema moraju biti transparentne, fer i korektne, što je također primijenjeno. Svi mogu preuzeti pitanja sa web stranice, a u momentu polaganja ispita sistem će im ponuditi određenu grupu pitanja. Ispiti se polažu pod šiframa. Nakon toga polaže se test fizičke sposobnosti, svaka faza prijema se snima i isključena je svaka mogućnost manipulacije.

Dakle, provedene su potpuno fer i poštene procedure za prijem što je implementacija principa i onoga što je propisano ovim zakonima.

Na isti način, trenutno se provodi procedura prijema novih 250 policijskih službenika, nakon čijeg prijema će biti raspisan javni konkurs za prijem još 200 policijskih službenika po istim procedurama.

Uredba o jedinstvenoj policijskoj uniformi

Vlada Federacije BiH je na sjednici održanoj 26.07.2023.godine donijela Uredbu o jedinstvenoj policijskoj uniformi policijskih snaga u Federaciji BiH, kojom se propisuje izgled jedinstvene policijske uniforme svih policijskih snaga Federacije Bosne i Hercegovine. Pod izgledom jedinstvene policijske uniforme podrazumijevaju se dijelovi, sadržaj, opis, skica, boja, oznaka i drugi elementi koji su definirani u tehničkim specifikacijama.

Nakon donošenja Uredbe o jedinstvenoj policijskoj uniformi policijskih službenika, Uprava policije MUP-a Kantona Sarajevo pokrenula je postupak javne nabavke policijskih uniformi. Nažalost, Uprava policije je zaprimila žalbe na tendersku dokumentaciju koje su prosljeđene Uredu za razmatranje žalbi BiH. Imajući u vidu vrijeme u kojem Ured za razmatranje žalbi rješava po žalbama, nažalost, Uprava policije ni nakon više od pet mjeseci od pokretanja postupka javne nabavke nije došla do faze otvaranja ponuda.

Body Worn kamere

MUP KS uputio je inicijativu Vladi KS za nabavku ovih uređaja još u aprilu 2021. godine i već tada je planirano skoro pola miliona KM za te namjene.

Proveden je postupak javne nabavke i Ugovor o nabavci mini video kamera sa pratećom opremom neophodnom za funkcionisanje cjelokupnog sistema MUP KS-Uprava policije i izabrani dobavljač potpisali su 22.novembra 2023.godine. Okvirno možemo računati da će policija u drugom kvartalu ove godine raspolagati mini kamerama jer treba uzeti u obzir i da je dobavljač dužan nakon isporuke izvršiti instalaciju mini kamera, a potom uraditi tehnički prijem robe i test funkcionalnosti, te obuku operatera i korisnika sistema. Obuka će uključivati

obuku vezanu za korištenje sistema za akviziciju podataka i obuku za svakodnevno korištenje kamera nošenih na tijelu. Vrijednost ugovora koji je zaključen za nabavku kamera je 418.795 KM bez PDV-a.

Ove kamere će omogućiti snimanje audio i video zapisa koji će služiti kao jasan prikaz svih situacija interakcije policijskih službenika i građana. Osnovna funkcija ovih kamera je ZAŠTITA! Naši policijski službenici će s jedne strane biti zaštićeni od potencijalnih zlonamjernih prijava, dok će s druge strane građani biti zaštićeni od eventualne zloupotrebe policijskih ovlaštenja.

Analiza mogućih izmjena Zakona o javnom okupljanju u KS

Partije: Vlada Kantona Sarajevo (NS, SDP, NiP) | Oblasti: Pravna država

Izvršiti analizu mogućih izmjena Zakona o javnom okupljanju u Kantonu Sarajevo.

Izvor: Program skupštinske većine u Kantonu Sarajevo 2023 - 2026

Organizacioni odbor Bh. povorke ponosa je 2022. godine zahtijevao hitno donošenje izmjena i dopuna Zakona o javnom okupljanju, međutim isti se još uvijek nije našao u zakonodavnoj proceduri. Kako se navodi u Rozom izvještaju 2023., Vlada KS je imenovala radnu grupu za rad na Nacrtu zakona, ali ni u 2021. godini, kada su bile najavljivane izmjene i dopune zakonodavstva, ni u 2022. godini do trenutka pisanja navedenog Izvještaja, nacrt ovog zakona još uvijek nije u procesu javnih konsultacija te nije došlo do poboljšanja zakonskog okvira koji regulira ovu oblast.

Povodom 100 dana mandata Vlade Kantona Sarajevo, 4. jula 2023. godine u Domu mladih KSC Skenderija održana je pres-konferencija na kojoj je premijer KS Nihad Uk predstavio rezultate rada ove vlade. Tom prilikom, ministar unutrašnjih poslova Admir Katica istakao je da je MUP KS prilikom rada na tekstu Zakona o javnom okupljanju u KS sarađivao sa predstavnicima međunarodne zajednice i drugim organizacijama ali da nije postignuta saglasnost u vezi s pojedinim predloženim odredbama. Istakao je da spontana okupljanja, na kojima, prema riječima njegovim riječima, insistira EU, nisu prihvatljiva iz sigurnosnih razloga.

S druge strane, naglasio je da su u MUP KS otvoreni za dalje konsultacije po pitanju ovog zakona i da vjeruje da će do kraja godine iznaći rješenje kojim će, prvenstveno, biti zadovoljni građani Kantona Sarajevo.

ODGOVOR: U PROCEDURI

Donijeti Zakon o nabavljanju, nošenju i držanju oružja KS

Partije: Vlada Kantona Sarajevo (NS, SDP, NiP) | Oblasti: Pravna država

Donijeti Zakon o nabavljanju, nošenju i držanju oružja Kantona Sarajevo, usklađen sa Direktivama EU.

Izvor: Program skupštinske većine u Kantonu Sarajevo 2023 - 2026

Postupak dobijanja odobrenja za nabavljanje vatrenog oružja i izdavanje oružnog lista, kao i postupak podnošenja zahtjeva za izdavanje isprava o oružju u Kantonu Sarajevo regulisan je odredbama Zakona o nabavljanju, držanju i nošenju oružja i municije i odredbama Pravilnika

o izgledu i sadržaju obrazaca isprava o oružju i zahtjeva za izdavanje isprava o oružju i drugih dokumenata. Izmjene i dopune važećeg zakona kao ni novi zakon usklađen sa Direktivama EU nisu se razmatrali u prvih 100 dana mandata Vlade KS.

ODGOVOR: U PROCEDURI

Implementacija Zakona o policijskim službenicima Kantona Sarajevo

Partije: Vlada Kantona Sarajevo (NS, SDP, NiP) | Oblasti: Pravna država
Implementacija Zakona o policijskim službenicima Kantona Sarajevo u smislu uvođenja i jačanja struke (vrste i stepena stručne spreme) kojima će se omogućiti prijem policijskih službenika stručno osposobljenih iz oblasti koje su usko povezane s obavljanjem policijskih zadataka.

Izvor: Program skupštinske većine u Kantonu Sarajevo 2023-2026

ODGOVOR: REALIZOVANO

MUP Kantona Sarajevo – Uprava policije, u augustu 2023. godine objavio je Javni konkurs za popunu slobodnih radnih mjesta policijskih službenika u Upravi policije MUP-a Kantona Sarajevo u početnom činu "MLAĐI INSPEKTOR", i to za prijem 30 mlađih inspektora, čija procedura je u toku.

Ovim javnim konkursom je implementiran propis o struci u policiji. Svi kandidati morali su dostaviti dokaz o završenom VII stepenu stručne spreme iz oblasti pravnih ili kriminalističkih, kriminoloških ili sigurnosnih studija (dodiplomski studij) akreditirane visokoobrazovne institucije.

Na web stranici MUP-a KS dostupni su svi podaci o toku prijema i provedbe navedenog javnog poziva za mlađe inspektore:

25.10.2023. godine objavljena je Lista kandidata koji su ispunili uslove za pristupanje testiranju i Lista kandidata koji nisu ispunili uslove za pristupanje testiranju - Javni konkurs za popunu radnih mjesta policijskih službenika u UP MUP KS - početni čin "MLAĐI INSPEKTOR"

27.12.2023. objavljena je Konačna lista kandidata koji su ispunili uslove za pristupanje testiranju po Javnom konkursu za popunu slobodnih radnih mjesta policijskih službenika u Upravi policije MUP-a KS u početnom činu "MLAĐI INSPEKTOR" - 30 izvršilaca objavljenom dana 25.08.2023.

01.02.2024. godine objavljena je Obavijest o rezultatima Testa fizičke sposobnosti sa priložima - Javni konkurs za popunu slobodnih radnih mjesta policijskih službenika u Upravi policije MUP KS - čin "MLAĐI INSPEKTOR"

12.02.2024. godine objavljena je Obavijest o terminima održavanja ljekarskog pregleda - Javni konkurs za popunu slobodnih radnih mjesta policijskih službenika u Upravi policije MUP-a KS - čin "MLAĐI INSPEKTOR"

Donošenje strategije za borbu protiv zloupotrebe droga

Partije: Vlada Kantona Sarajevo (NS, SDP, NiP) | Oblasti: Socijalna politika

Donošenje strategije za borbu protiv zloupotrebe droga.
Izvor: Program skupštinske većine u Kantonu Sarajevo 2023-2026

ODGOVOR: REALIZOVANO

28.12.2023. godine predstavljena je Strategija i Akcioni plan za sprečavanje i suzbijanje zloupotrebe opojnih droga u Kantonu Sarajevo

Na hitnoj sjednici Skupštine Kantona Sarajevo o sigurnosti u saobraćaju, održanoj 09.06.2023. godine, Vlada KS zadužena je da donese program prevencije i suzbijanja zloupotrebe opojnih droga, s posebnim fokusom na kontrolu učesnika u saobraćaju, a nosilac aktivnosti bio je MUP KS. Ministar unutrašnjih poslova KS Admir Katica formirao je stručni tim sačinjen od dugogodišnjih stručnjaka i profiliranih pojedinaca u različitim segmentima suprotstavljanja zloupotrebi opojnih droga koji su prethodnih mjeseci intenzivno radili na izradi Strategije i Akcionog plana, te definisali opće ciljeve, područje djelovanja i posebne strateške ciljeve.

„Kreirali smo Strategiju i akcioni plan koji neće biti mrtvo slovo na papiru, formirat ćemo i radno tijelo koje će pratiti realizaciju ovih mjera i radit ćemo na tome da se borimo protiv ove pojave. U narednoj godini planirali smo iznos oko pola miliona konvertibilnih maraka za nabavku testera za mjerenje prisustva opojnih droga u organizmu vozača, zatim za provođenje aktivne kampanje za borbu protiv zloupotrebe droga i aktivnosti nevladinog sektora po ovom pitanju,“ izjavio je ministar MUP-a KS Admir Katica.

„Veoma je važno da naglasimo da ova Strategija uključuje i upućivanje inicijative i zahtjeva prema nivou FBiH da se dekriminalizira posjedovanje određene količine pojedinih supstanci, jer ako ovaj dio prebacimo u prekršajnu sferu možemo se efikasnije boriti protiv kriminaliteta vezanog za ovu oblast. Također, istakao bih da je naše Odjeljenje za borbu protiv zloupotrebe droga u okviru Uprave policije MUP-a KS veoma dobro kapacitirano stručnim osobama u toj oblasti, ali definitivno ćemo ubuduće raditi na izmjenama Pravilnika o unutrašnjoj organizaciji i sistematizaciji i osnaživati taj sektor, kako materijalno tako i kadrovski,“ dodao je ministar Katica.

Radom stručnog tima uspješno je koordinirao predsjednik Nermin Lagumdžija, dugogodišnji rukovodilac Odjeljenja za borbu protiv opojnih droga u KS i FBiH.

"Stručni tim je intenzivno radio četiri mjeseca na ovoj problematici. Uradili smo situacionu analizu na osnovu službenih podataka nadležnih institucija jer do sada na području Kantona Sarajevo nije bilo većih istraživanja na osnovu kojih se mogla pratiti ova pošast. Tim se rukovodio u 3 pravca: u pravcu smanjena ponude, potražnje i štete.", kazao je Lagumdžija dodavši da se pri izradi strategije vodilo računa o zakonskoj regulativi, ljudskim pravima i slobodama, zaštitom i pravima djeteta, uključivanju nevladinog sektora i transparentnosti.

„Prema podacima javne ustanove za ovisnosti u Kantonu Sarajevo, u posljednjih pet godina zbog problema sa zloupotrebom droga, za medicinski tretman javilo se oko 9.312 lica. Poređenja radi, u Kliničkom centru Univerziteta u Sarajevo 1991. godine na Odjelu za neuropshijatriju liječilo se 45 ovisnika iz cijele BIH, pa sami procijenite kakva je situacija,“ dodao je Lagumdžija.

Važan korak u izradi Strategije i akcionog plana za sprečavanje i suzbijanje zloupotrebe opojnih droga u Kantonu Sarajevo bila je izrada situacijske analize koju je predstavio Rusmir Pobrić zastupnik u Skupštini KS i predsjednik Komisije za mlade Skupštine KS.

„Situaciona analiza je bazirana isključivo na službenim podacima institucija Kantona Sarajevo. Izvještaj Kantonalnog tužilaštva iz 2022.godine pokazao je da su djela vezana za zloupotrebu opojnih droga: proizvodnja, trgovina, posjedovanje i omogućavanje uživanja

opojnih droga apsolutno najdominantnije djelo u strukturi podignutih optužnica, 50 posto svih krivičnih djela su direktno ili indirektno vezana za zloupotrebu droga. Od 9.312 ovisnika, oko 80 posto su muškarci, a 20% žene," izjavio je Pobrić.

Profesorica na Fakultetu za kriminalistiku, kriminologiju i sigurnosne studije Univerziteta u Sarajevu Irma Deljković dala je ogroman doprinos u definisanju strateških principa i općih ciljeva Strategije, kao i utvrđivanja područja djelovanja

„U skladu sa ciljevima strategije, izrađen je akcioni plan koji propisuje jasne mjere. Ukupno je predviđeno 59 provedbenih aktivnosti gdje su definisani nosioci ovih aktivnosti. Posebni cilj je smanjenje ponude opojnih droga. Za ovaj cilj propisane su tri mjere: smanjenje dostupnosti i učinkovita kaznena politika; zatim, smanjenje potražnje, a tu su mjere sprečavanje korištenja droga i podizanje svijesti o štetnom djelovanju. Treći cilj je smanjenje šteta i rizika", izjavila je prof.Deljković.

Alen Ališahović, samostalni inspektor i načelnik Odjeljenja za borbu protiv zloupotrebe opojnih droga Uprave policije MUP-a KS govorio je provedbi akcionog plana koji je sastavni dio ove strategije.

„Naši naponi na ovom planu svakako ne počinju tek sada, međutim Uprava policije će svoj primarni fokus staviti na smanjenje dostupnosti i ponude opojnih droga, te povezanog kriminaliteta. Naše čvrsto opredjeljenje u borbi protiv zloupotrebe opojnih droga vidljivo je i kroz naše operativne akcije koje provodimo tokom cijele godine, kako samostalno, tako i u saradnji s kolegama iz drugih agencija. Mi ćemo to nastaviti i ubuduće,“ izjavio je Ališahović. „Kroz ovaj strateški dokument, dodatno smo definisali određena unapređenja u metodama i pristupu. Jedna od njih je i pojačano testiranje vozača na opijate. Već smo pokrenuli postupke nabavke testova i vjerujem da ćemo ih čim prije imati na terenu. Zaključno, želio bih istaknuti da je i ovim dokumentom predviđen intenzivan rad u pogledu preveniranja zloupotrebe opojnih droga na štetu djece, primarno u školskim prostorima. Policajci u zajednici su ovo pitanje prije nekoliko godina stavili u svoj prioritet, i to je dalo rezultate. Imamo namjeru ove aktivnosti dodatno ojačati“, dodao je Ališahović.

Stručni tim za izradu Strategije i Akcionog plana za sprečavanje i suzbijanje zloupotrebe opojnih droga u Kantonu Sarajevo su činili: Nermin Lagumdžija, dugogodišnji rukovodilac Odjeljenja za borbu protiv opojnih droga u KS i FBiH; Irma Deljković, profesorica na Fakultetu za kriminalistiku, kriminologiju i sigurnosne studije Univerziteta u Sarajevu; akademik Borislav Petrović, profesor na Pravnom fakultetu Univerziteta u Sarajevu, Alen Ališahović, samostalni inspektor i načelnik Odjeljenja za borbu protiv zloupotrebe opojnih droga Uprave policije MUP-a KS; Safet Mušić, ekspert za sigurnosna pitanja; Anesa Agović – nacionalna koordinatorica Globalne inicijative protiv transnacionalnog organizovanog kriminala i Rusmir Pobrić zastupnik u Skupštini KS i predsjednik Komisije za mlade Skupštine KS.

Donijeti Zakon o prekršajima protiv javnog reda i mira

Partije: Vlada Kantona Sarajevo (NS, SDP, NiP) | Oblasti: Pravna država

Donijeti Zakon o prekršajima protiv javnog reda i mira.

Izvor: Program skupštinske većine u Kantonu Sarajevo 2023-2026

Vlada KS usvojila je krajem aprila Nacrt zakona o prekršajima protiv javnog reda i mira kojim su predviđene sankcije za nasilje na internetu, kao i širenje lažnih vijesti. Ovaj nacrt naišao je na brojne kritike javnosti.

ODGOVOR: U TOKU

Nakon usvajanja Nacrta Zakona o prekršajima protiv javnog reda i mira, formirana je Radna grupa koju čine stručna lica iz raznih oblasti, uključujući i predstavnike medija / novinarskih udruženja, a s ciljem usklađivanja odredbi zakona kojim će se regulisati internet kao javni prostor i definisati način borbe protiv nasilja na internetu i zaustavljanja govora mržnje, te naći najoptimalnije rješenje. Radna grupa intenzivno radi na usklađivanju navedenih odredbi.

Donijeti Zakon o plaćama policijskih službenika u KS

Partije: Vlada Kantona Sarajevo (NS, SDP, NiP) | Oblasti: Pravna država

Donijeti Zakon o plaćama policijskih službenika u Kantonu Sarajevo.

Izvor: Program skupštinske većine u Kantonu Sarajevo 2023 - 2026

Tokom prvih 100 dana mandata Vlada KS nije provodila aktivnosti na ispunjenju ovog obećanja.

ODGOVOR: RAZMATRA SE

Jačanje forenzičkih kapaciteta MUP-a Kantona Sarajevo

Partije: Vlada Kantona Sarajevo (NS, SDP, NiP) | Oblasti: Pravna država

Nastaviti sa jačanjem forenzičkih kapaciteta MUP-a Kantona Sarajevo u smislu brzog i efikasnog korištenja DNK, daktiloskopskih, balističkih i drugih analiza kao najvažnijeg aspekta u otkrivanju i dokazivanju kriminaliteta.

Izvor: Program skupštinske većine u Kantonu Sarajevo 2023-2026

Prema informacijama koje je Istinomjer dobio 23. juna 2023. godine od MUP-a KS nadležne organizacione jedinice MUP-a KS provode aktivnosti iz pripreme faze realizacije koje se odnose na utvrđivanje objektivnog obima i vrste potreba forenzičkih vještačenja, te ispitivanja tržišta u smislu pronalaska vrste i tipa odgovarajuće opreme, pronalaska mogućnosti za prostorno obezbjeđenje laboratorijskih kapaciteta, uz planiranje i projiciranje edukacije potrebnog kadra specifičnih znanja i usko specijalizovanih stručnjaka.

ODGOVOR: U PROCEDURI

Ulaganje u materijalno-tehničko opremanje policije

Partije: Vlada Kantona Sarajevo (NS, SDP, NiP) | Oblasti: Pravna država

Nastaviti sa stalnim jačanjem operativnih kapaciteta kroz ulaganje u materijalno-tehničko opremanje policije.

Izvor: Program skupštinske većine u Kantonu Sarajevo 2023-2026

Vlada KS provodila je nekoliko projekata koji su za cilj imali jačanje materijalno-tehničkih uslova rada policije kroz usvajanje kapitalnih projekata za nabavku opreme i poboljšavanje uslova rada.

ODGOVOR: REALIZOVANO

MUP Kantona Sarajevo u 2024. godini osigurao je budžet od 137,8 miliona konvertibilnih maraka, a značajan dio sredstava bit će usmjeren na opremanje i jačanje policijskih struktura, kao i infrastrukturne projekte koji će se naći u fokusu djelovanja u ovoj godini.

MUP KS na ovaj način pokazuje jasno opredjeljenje za jačanje materijalnih i ljudskih resursa čime će se sigurnost i briga za građane podići na viši nivo, a istovremeno osigurati adekvatni uslovi za rad svim pripadnicima ovog sigurnosnog organa.

S ciljem uspješnog i efikasnog izvršavanja unutrašnjih poslova KS, u ovoj godini osigurat će se bolja opremljenost, zaštita i sigurnost policijskih službenika kroz nabavku novih kompletnih uniformi za policijske službenike, kao i zaštitne opreme, opreme za specijalizirane timove, te opreme za potrebe rada krim policije. Također su planirane i specijalističke obuke za policijske službenike, ali i sredstva za školovanje kandidata za buduće pilote helikopterske jedinice na renomiranim policijskim akademijama.

Planirano je i proširenje sistema putem kojeg se vrši provjera i akvizicija registarskih tablica vozila na terenu u trenutku prolaska pored kamera i automatska provjera u bazi radi eventualno počinjenih prekršaja, isteka registracije i slično. Ovaj sistem bit će postavljen na još 20 lokacija u KS.

Sedam novih oklopnih transporterata

Građani će na ulicama KS moći vidjeti i nova oklopna vozila multifunkcionalnog karaktera koja će moći odgovoriti na više sigurnosnih izazova.

„Ove godine će MUP KS biti pojačan sa 7 novih oklopnih transporterata, od čega smo za tri specijalna vozila potpisali ugovor u junu prošle godine i očekujemo isporuku. Krajem 2023. godine smo raspisali postupak nabavke za još dva takva, a u budžetu za 2024. smo predvidjeli sredstva za još dva. Kada tome dodate da ćemo vrlo brzo imati 250 novouposlenih policijskih službenika prema konkursu koji završavamo i još 200 prema konkursu koji raspisujemo, možete računati na novi, podmlađeni, stručni i u potpunosti opremljeni policijski kadar Kantona Sarajevo,“ izjavio je ministar Katica.

Ukazao je i na činjenicu da će sigurnost u saobraćaju sljedeće godine dodatno biti ojačana nabavkom novih radarskih sistema.

„Planirali smo 1,5 miliona maraka u budžetu za nabavku novih radarskih sistema kojima ćemo povećati sigurnost u saobraćaju i proširiti sistem stacionarnih i mobilnih radarskih uređaja na autocestama u Kantonu Sarajevo. Na taj način ćemo efikasnije suzbijati i sankcionisati prekršaje u saobraćaju,“ kazao je Katica.

Osim toga, MUP KS privodi kraju postupak nabavke helikoptera i odmah po završetku zakonskih procedura i utvrđenih rokova, ovo višenamjensko sredstvo će koristiti građanima Kantona Sarajevo u svim kriznim situacijama, ali i svim ostalim građanima u Bosni i Hercegovini, prema potrebama.

U drugom kvartalu ove godine MUP KS imat će body kamere na uniformama policajaca. Ovo je veoma važno sredstvo u radu koje će nuditi objektivnu istinu u situacijama kada se primjenjuju policijska ovlaštenja i eventualno može doći do prijava od strane građana, te će policajci na taj način biti zaštićeni. Za policiju je to važan instrument u smislu poboljšanja rada i efikasnosti policije, poštovanja ljudskih prava, te prevenivni mehanizam za zaštitu od svih oblika nezakonitih ponašanja.

Uspostavljanje helikopterske jedinice

Partije: Vlada Kantona Sarajevo (NS, SDP, NiP) | Oblasti: Pravna država

Nastaviti sveobuhvatne systemske aktivnosti na projektu uspostavljanja helikopterske jedinice MUP-a Kantona Sarajevo, te stvaranje neophodnih uvjeta za nabavku i isporuku višenamjenskog helikoptera tokom perioda 2024 – 2025. godina, za operativne poslove MUP-a Kantona Sarajevo, ali i za civilne potrebe – podrška za medicinske intervencije, elementarne nepogode (požari, poplave, zemljotres i sl.), doprema svih vrsta pomoći, kontrola dalekovoda, ptt predajnika i mobilnih uređaja i ostalo.

Izvor: Program skupštinske većine u Kantonu Sarajevo 2023-2026

ODGOVOR: REALIZOVANO

Ministar MUP-a Kantona Sarajevo Admir Katica primio je u januaru ove godine izabrane kandidate za helikoptersku jedinicu MUP-a KS, koji su zadovoljili kriterije javnog konkursa završenog u aprilu 2023. godine. Šest kandidata zadovoljilo je stroge uslove i kriterije konkursa koji su uključivali fizičku spremu, poznavanje geografije, engleskog jezika, ljebarske preglede, sigurnosne provjere i u konačnici selektivno letenje.

Sastanku su prisustvovali i Muhamed Hasanović načelnik Sektora za policijsku podršku, kao i Omer Kulić, stručni konsultant, inženjer vazduhoplovstva i instruktor letenja, koji predvodi radnu grupu za uspostavu helikopterske jedinice MUP-a KS. Kako je istakao Kulić, MUP KS će snositi troškove školovanja izabranih kandidata koji će biti u obavezi da potpišu ugovor o desetogodišnjem angažmanu u MUP-u KS i radu za helikoptersku jedinicu.

Ministar Katica je poručio budućim pilotima helikopterske jedinice MUP-a KS da su na putu do uspostavljanja helikopterske jedinice najvažniji ljudski resursi i da računa na njih.

MUP Kantona Sarajevo objavio je u februaru ove godine javnu nabavku za usluge školovanja pilota i aviomehaničara za potrebe MUP-a KS, putem otvorenog postupka, sa međunarodnom objavom, gdje je predviđeno zaključivanje okvirnog sporazuma sa jednim ponuđačem za period od tri godine. Postupak je u toku.